

**PR Ramal PRU13 Diadakan September Atau November Ini - Mustafa
Mstar Online
Ogos 07, 2012
Oleh NURUL AIN MOHD HUSSAIN**

PETALING JAYA: Pakatan Rakyat (PR) meramalkan Perdana Menteri, Datuk Seri Mohd Najib Tun Razak akan mengambil kesempatan mengumumkan tarikh Pilihan Raya Umum ke-13 (PRU13) sempena sambutan Hari Kemerdekaan pada tahun ini.

Setiausaha Agung PAS, Datuk Mustafa Ali berkata, Najib akan mengumumkan tarikh pilihan raya umum pada sambutan hari kemerdekaan namun PRU13 mungkin akan diadakan pada September atau November depan.

Beliau berkata, PR telah bersedia untuk menghadapi pilihan raya ini walaupun tarikhnya masih menjadi tandatanya semua pemimpin politik.

"Najib akan ambil kesempatan dengan Hari Kemerdekaan kali ini untuk memulihkan kembali imej dan umumkan tarikh PRU.

"Apa pun tarikh PRU, kita (PR) telah bersedia untuk menghadapinya," kata beliau pada sidang media selepas menghadiri mesyuarat Setiausaha Pakatan Rakyat di Ibu Pejabat Parti Keadilan Rakyat di sini pada Selasa.

Spekulasi mengenai PRU13 akan diadakan tidak lama lagi bertiup kencang apabila Perdana Menteri mengumumkan Bajet 2013 akan dibentangkan pada 28 September ini - tidak sepertimana kebiasaan iaitu pada pertengahan Oktober.

Justeru, ramai yang menjangkakan Najib akan mengumumkan pembubaran Parlimen beberapa minggu lagi untuk diadakan pilihan raya pada bulan September atau November ini.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/8/7/mstar_berita/20120807164717&sec=mstar_berita